

## MELKIZEDEK KUA AHIA?

*L. James Guite*

Lai Siangthou a mi tuamtuam kigen tampite lak ah, Lai Siangthou lunglut mite a dia theihnop huai gige leh theihbeh utna hon piangsak gige mi khat om hi. Mihingte lungsim pen 'theihbeh utna toh kidim', 'a lungkim thei mengmenglou' leh a lunglawn huai deuh thute ngaihsun a, a kigelh ban a suangtuahna (speculation) bangzah hiam va sunlut pen chiindan a hikhassek hi. Tua bang a ngaihsutna hon lawngkha mahmah, Lai Siangthou a genkhak a om mipa bel **MELKIZEDEK** kichi ahi. Huai mipa pen kua hi a, koi a hong kipan a, bangziak a genkhak a om ahia?

Melkizedek tungtang thu ah i ngaihsutna hon lawnkhak veu nakna ziak pentak hiai ahi; "Amah tuh pa neilou, nu neilou, khangthu bei, ompatni neilou, hin tawp leng nei samlou in, Pasion' Tapa bang a siam tangtawn siampu ahi gigezaw hi" (Heb. 7:3). A nu-le-pa omlou, ompatni leh beini neilou chih a om ahihman in Pasion Tapa mah, leitung a a hong piankhiakma a, Abraham hun a leitung hong pha zual ahi diam? Ahihkeileh, Pasion' angel hat khat mihing bang a leitung a hong khosa ahi diam? Ahihkeileh, leitung mihingte hilou, sol (planet) dang a kipan hong khualzin mi (*alien-te*) khat houh ahi diam chi in lunglawng thei dotna tampi piangkhe thei hi.

Melkizedek toh kisai Lai Siangthou sung a laibu tuamtuam thum ah muh in om hi.

- 1) **Gen. 14:18-20** kikal ah Abraham, galzou a a hongpai lai a ana kituahpih thu, Abraham in a gallakte' lak a sawm-a-khat a piak thu, leh Abraham a vualzawl thu saulou chik in ana kigelh hi. Amah bel Salem kumpipa ahidhan leh Pasion tungnungpen' siampu ahidhan leng ana gentel hi.
- 2) **Sam 110:4** Melkizedek omdan bang a siampu hong hi diing kuahiam khat om ahidhan genlawk in ana om hi.
- 3) **Heb. 5:6,10** Pasion in a Tapa Jesu Khris pen Melkizedek omdan bang a siampu lianpen a bawlta ahidhan leh Sam 110:4 tangtunna pen Khris ahidhan a gen hi. Huaiban ah **Heb 7**na pumpi ah **Melkizedek omdan bang a siamputna** leh **Aaron omdan bang a siamputna** a kibatlouhna khaikhinna diing in Melkizedek tungtang a hon gen nawn leuleu hi.

Hiai a tung a laibu thumte loungal Melkizedek toh kisai genkhakna omlou hi. Hiai bu thumte lak ah Hebru laikhak in nak gen diak a, huai laibu ngei ah Melkizedek pen bang chibang mihing ahi de aw chi a lung hon lawngsak thei diing hihnate gen in na om hi. Huaiziak in Melkizedek kua hi a, bang poimohna nei a Lai Siangthou a genkhak a na om hiam chih i theihelna diing in **Hebru laikhak** bang ziak a gelh a om a, kuate' kiang a bang thu toh kisai gen a om hiam chih i theihel masak ngeingei poimoh hi.

Hebru laikhak pen Jerusalem khua a siampute' lak apan hong piangthak (Nas 6:7), Levi siamputna bultumtak a theichian mite kiang a thugen (*sermon*), a khonung lam a gelhkhiak thak a hong om hi in Lai Siangthou suuimite'n a na gen uhi. Mosi daan nuai a Levi siamputna chiiktak a zui kimlai a hong piangthak siampute'n khristian hun bangtan hiam a hon zat nung un huai siamputna lui lam mitsuan a om nawn ahihman un, Levi

siamputna ahihkeileh “**Aaron omdan bang a siamputna**” (Heb 7:11) sang a Jesu Khris’ siamputna tungtuangzaw ahihdan nouneltak a suutna laibu ahi.

Mosi daan (Thukhun Lui) dungzui in, Levi siamputna pen “**a khang-a-khang a kiluhsawn siamputna**” ahi. Siampu hithei diing in Levi chi a mi ahih teitei uh kuul hi. Levi nam a kipan hikhalou Israel nam dang (ets. Judah, Benjamin, Naphtali adg.) siamputna nna seem dia va kigolh a om uleh “**sihsak diing**” a thupiak ahi uh (Nam. 3:10). Huai omzia bel, Mosi daan nuai a siamputna pen “**A nu-le-pate uh, suangtute’ ziak a a ngah uh siamputna**” ahi.

Hebru laikhak a thugentu in bung 4na a kipan in Judah nam a kipan hong suak Jesu Khris pen (Heb 7:14) **Siampu lianpen** ahihdan (4:14-15) a hon gen suksuk hi. Levi nam a kipan loungal namdangte’n siampu hihna tang theilou ahihdan theitel mahmah mite kiang a, tang-a-tuan a ana gintaksa uh thu toh kituaklou, huai bel **Judah nam a kipan hong suak mipa in Melkizedek omdan bang a siamputna lata** (Heb 5:10) ahihdan a hon gen leh a ngaihna theilou in, thugen ngaikhetute hamhah gawp uhi.

Huchi in Heb 5:10 ah, thugentu in a thugen kimlai hon khawlsan guih in “*a hun thu ngaihtuah a zaw heutu hikhinta dia kilawm himahle uh... angum hilou in nawitui kiphamoh*” thak phiing uh ahihthu a gen hi. Huchi bang a theihna lam a khangtoulou a omna pen a lauhthawn huaidan leh, huai in manthatna a hon pilutthei ahihdan gen in Heb 5:11-6:19 kikal ah hasotna leh vauhilhna na gen hi.

Levi siamputna (khanggui a kiluhsawn a siamputna, ahihkeileh suangtu nu-le-pate ziak a ngahsawn siamputna) hilou siamputna dang omthei ahihdan ngaikhe thei diing tan a, a lungsim uh a hong kihon phet in Heb 6:20 a kipan bung 7na pumpi ah **Jesu siamputna pen Melkisedek omdan bang a siamputna** ahihdan hon sunzom ngeuhngeuh nawn hi.

Awle, hiai tan i genna a kipan in Hebru laikhak in bangziak a **Melkizedek** genkha hiam chih i limsiam theih uh i gingta hi. A tung a i gensa thute lungsim a koih kawm in Thukhun Lui lam ah saulou i lutkik nawn zual diing.

Levi siamputna pen Pasion in Sinai tang tung a Mosi kiang a daan a piak a kipan (Exo 20) hong kigen khapan hi. Khanggui a kiluhsawn siamputna pen Exodus laibu a kipan hong kipantou pan ahi chih i muthei. Himahleh Hebru laikhak a thugentu in **Jesu Siamputna** a hon genlai in Mosi’ hun matham **Gen 14** na a Levi siampute suangtupa Levi ngeingei a pianma lam pekpek thu ah a hon pantou hi.

Genesis laibu (bung 14) ah Khopi khat a na om a, huai bel “Salem” khopi ahi. A nung lam in Canaante’n huai khopi a hon luah ua “Jebus” a hon sa uhi. Huaizoh in Israel tate’n huai khopi a hon luahtak un “Jerusalem” (Sam 76:2) a hon sa ua, huai min in tunitan chiamteh in a om hi. Huai “Salem” khopi ah, kumpi khat a om a, a min **Melkizedek** ahi. Huai kumpipa bel kumpi kia hilou in “**Pasion tungnungpen’ siampu**” leng ahi.

Mosi daan nuai ah bel “**siamputna**” leh “**kumpi hihna**” pen ofis tuamtuak ahi uh. Himahleh Melkizedek in bel huai ofis tegel ana thuahkhawm hi. Huaiban ah, Mosi daan nuai ah siampu hih theihna di’n **Levi nam a mi a hih ngeingei uh** kuul hi. Melkizedek bel Levi chi hikhakei mahleh **Pasian tungnungpen’ siampu** ahi. Levi siampute bang a a suangtu nu-le-pate’ ziaak a **siamputna** ngah ahikei. Pasian in a siampu dia a seh ahizaw hi. Huaiziak in, **Melkizedek** pen “*nu-bei, pa-bei, khangthu bei...*” chi in na chiamteh hi. A tak a nu neilou, pa neilou, sing-hawm, suang-hawm a piang chihna hilou in a dinmun pen a nu-le-pate, amah suangtute ahihkeileh a khanggui ziaak a a ngah hilou ahildan telkheh seemna dia a gen ahizaw hi.

Mosi daan nuai a Levite’ siamputna ah bel, Levi nam a mi ahihia uh hilou in kum 25 a phak ua kipan kum 50 a phaktan uh siampu nna seemthei phet uhi (Nam 8:24-25). Huai kia hilou in Mosi Daan zat a hih a kipan Levi siamputna kipan pan a, Mosi daan a bei toh kizui in huai siamputna daan zong na beita hi. Huaiziak in Levi siamputna (**Aaron omdan bang a siamputna**) pen **ompatni** leh **omtawpni** ana nei a, **tangtawn siamputna** ana hi zoulou hi. A lehlam ah, “**Melkizedek omdan bang a siamputna**” bel a kipat hun leh tawp hun diing kum bikhiah omlou a, beini neilou ahihman in tangtawn daih hi. Huaiziak in, “**ompatni neilou, omtawp (hintawp) leng neilou...tangtawn siampu**” chih in a omzaw hi.

Huaiziak in, Hebru laikhak gelhtu in Jesu Siamputna pen Levite siamputna ahihkeileh “**Aaron omdan bang a siamputna**” hilou in, “**Melkizedek omdan bang a siamputna**” ahildan teltak a a gennop ziaak in **Melkizedek** pen genkhak a hong om ahildan i muthei hi. **Sam labu** gelhtu in “**Melkizedek omdan bang a siampu**” kua hiam khat Pasian in sepkhe diing ahildan ana genkhawl a, huai thugenkholh tangtunna pen Jesu Khris ahildan leng teltak in a gen hi.

Mawlchik a gen in i Laisiangthou in a hon sinsakna i muhtheihna tan ah, **Melkizedek** pen Salem kumpipa ahi a, Pasian tungnungpen siampu dia hunkhat lai a Pasian in ana seh mi thupi leh poimoh mahmah khat ahi. Huai Melkizedek seh a a om bangbang in tuni in nang-le-keite khelh thoihna laantu diing in Pasian in Levi siamputna sang a tungtuangzaw, tangtawn siampu lian hi diing in Jesu Khris ana septa hi.

*“Huchi in vaan khawng bang a paisuak khinsa Siampu Lianpen thupitak, Jesu, Pasian Tapa i neih ziaak in I ginna uh I lenkip diing uh. Siampu Lianpen I hatlouhdan kitheihnate hon theihpih phalou nei I hi ngalkei a, eimah bang a lam tuamtuam a kheemna tuaksa khelh bel khiallou, nei I hizaw uhi” (Heb. 4:14-15).*

Unau, na khelhnate toh Toupa Jesu Khris kiang zuan in. A thupiakte gingta in, A sisan a thukhun a bawl dungzui in na khelhnate ngaihdamna diing in Jesu Khris min in kituiphuum lechin Jesu Khris in na khelhnate a dia a taktak Vaan khopi a A sisan tawi a khelh thoihna ana latsak ziaak in ngaihdam in na om diing a tangtawn hinna na ngah diing hi.